

von Wulf Wager

## B 10 sechsspurig



Jonger Vaddr, des hot jo mol richtig baddet. Die Bundesregierung hot ihren bunta Verkehrswegeplan vorgstellt. Mit Spannung isch erwartet worda, was in dr Region Stuegert in de näggschde Jahr so alles zom Ausbau kommt. Ond - gucket au - endlich wird die B 27 von Aich bis LE ausbaut. Des isch au dringend naitig - standat sich doch dort jeden Morga ond jeden Obend d' Autos d' Fiaß en Bauch.

Richtig spannend fend i aber, dass dr Herr Verkehrsminischer Dobrindt, in vollständiger Unkenntnis der örtlichen Verhältnisse, au die B 10 zwischa Plochinga ond dr Wilhelma sechsspurig ausbaua will. Ha no! Wie soll au des ganga? Em Neckrtal isch doch gar koin Platz für sechs Spura! Höggschdens, mr will da Neckr überdeckla ond do die no fehlende zwoi Spura drufbaua. Ha so en hirnloser Bleedsinn ka bloß ma Beamta im grüna Tisch em preußischa Berlin eifalla.!

Obwohl wenn i nomol drieber nochdenk, no hot der Dobrindt wahrscheinlich mit seim, für's Land zuständige, ebaso unkenntnisreiche Verkehrsminischer Hermann (an ehemaliger Lehrer - dia wissat ond kennat jo sowieso alles!) den Ausbau ausg'heckt. Dann sollat nämlich dia Autos ganz vrschwenda ond dodrfier dia B 10 in a sechsspurige Fahrrad-Bundesstroß ombaut werda. Jetzt kapiert des erscht. Raffiniert! Auf so a saubleede Idee wär jo net amol i komma ...

Bis näggschd Woch'

Ihr

Wulf Wager